

# Passugger ed Allegra puspei Grischuns

Allegra Passugger Mineralquellen SA cumpra ils dretgs da marca per Passugger ed Allegra

■ (gic) L'interpresa Allegra Passugger Mineralquellen SA (APM) cumpra igl emprem d'october ils dretgs da marca dallas auas mineralas Passugger ed Allegra. Quels s'audan actualmein a Feldschlösschen Getränke SA (FSG). APM surpren era il menaschi d'imbuttegljar e creescha en quei connex quater novas piazzas da lavur a Passugg. APM e FSG ein ultra da quei secunvegna da colaborar els secturs da produziun, logistica e vendita. Naven digl emprem d'october distribuescha e venda APM ses products ellas regiuns Grischun, Turitg, Svizra dil sidost e Svizra centrala da Passugg anora. La distribuiziun e vendita ellas ulteriuras regiuns svizras vegn fatga dil partenari da fatschenta Feldschlösschen Getränke SA. El ha ina participaziun minoritaria vid l'interpresa APM che vegn fundada en cuort. Felschlösschen occupescha era in post el cussegl d'administraziun.

## Expansiun e piazzas da lavur

Igl acziunari principal e meinagestiun dalla APM, Urs Schmid, ei satisfatgs da quella transacziun. «Ils dus products da marca da Passugger Heilquellen ein puspei en possess grischun.» La finamira dad Urs Schmid ei d'augmentar la produziun dallas marcas Passugger ed Allegra. Per ils endisch emploiai dall'interpresa FSG midi quella cumpra nuot, ha el fatg da saver. APM creescha el sector da vendita ed ell'administraziun en in emprem pass quater novas piazzas. Era el sector da logistica vegn ei tenor APM a dar novas piazzas da lavur. La clientela d'Allegra e Passugger duei restar la gastronomia e la fiera da bubrondas classica. Allegra Passugger Mineral-


quellen SA vul oravontut engrondir sia influenza en quellas spartas. Ultra da quei vegn era igl export dallas auas mineralas grischunas examinaus. La finamira seigi en quei connex da seconcentrar sin singulas tiaras che ston vegnir definidas.

## Dapi il 16avel tschentaner

Gia el 16avel tschentaner ha Johannes Antistes Fabricius constatau che l'aua dalla Val Rabiusa hagi ina buna influenza sin la sanadad da ses habitonts. Igl onn 1863 ha Ulrich Sprecher danovamein discuvretg enten encurir aur la fontauna d'aua minerala ascha ella cavorgia dalla Rabiusa. Ella era gia dapi liung temps curclada da material ed ida en emblidonza. Theophil Sprecher, igl anteriur schef dil stab general, ha cumprau igl onn 1874 la fontauna dalla vischnaunca da Malix. Cun quella cumpra ha el mess la basa per il diever commercial dalla fontauna. L'interpresa Passugger Heilquellen SA vegn fundada igl onn 1896 a Turitg. Ella ha construiu in hotel cun menaschi da cura, vias da spassegiar ed ina sala da beiber ella cavorgia. Las duas uiaras mundialas han caschunau – suenter ina culminaziun all'entschatta dil 20avel tschentaner – ina munconza da hosps el menaschi da cura. Per quels motivs ei la societad seconcentrada igl onn 1951 egl imbuttegljar l'aua minerala. L'interpresa Feldschlösschen Getränke AG ha surpriu ed integrau igl onn 2000 l'interpresa «Passugger Heilquellen» cul menaschi a Passugg.



Argus Ref 20460985



**Urs Stephan Schmid, acziunari principal e meinagestiu dalla Allegra Passugger Mineralquellen SA, avon sia nova interpresa a Passugg.**

MAD